

Cadangan perlu konstruktif bukan retorik

SHAH ALAM – Saranan lima langkah drastik yang perlu dilaksanakan kerajaan untuk membolehkan ekonomi negara kembali pulih perlu dibuat secara terperinci agar tidak hanya menjadi retorik semata-mata.

Pensyarah Kanan Putra Business School, Universiti Putera Malaysia (UPM), Dr Ahmed Razman Abdul Latiff berkata, banyak perkara yang masih perlu diteliti dan diambil kira termasuk saranan agar kerajaan memansuhkan cukai GST dan menurunkan harga petrol.

“Dalam teori ekonomi, kerajaan akan mewujudkan cukai untuk sumber pendapatan bagi menampung dan mengimbangi perbelanjaan.

“Apabila kita bercakap tentang langkah ‘mansuhkan GST dan menurunkan harga petrol, kita kena tengok apa sumber alternatif lain yang ada untuk menampung perbelanjaan sedia ada, pelaksanaan langkah ini tanpa memikirkan alternatif terhadap perbelanjaan sedia ada hanya akan mewujudkan satu lagi isu yang lain.

“GST hanya boleh dimansuhkan jika kita telah kenal pasti bentuk pendapatan lain atau pun kerajaan perlu kurangkan perbelanjaan tahunan.

“Namun perlu diingat, pengurangan perbelanjaan tahunan mungkin beri kesan kepada kesejahteraan rakyat kerana perbelanjaan negara lebih banyak digunakan untuk pembangunan,” katanya.

Dalam langkah memulihkan nilai ringgit, Bank Negara tidak mampu mengawal perubahan nilai ringgit sepenuhnya kerana terdapat beberapa faktor luar kawalan yang mempengaruhi perubahan nilai

ringgit.

“Selagi ringgit berlandaskan nilai wang fiat (nilai yang ditentukan), ia akan sentiasa terkesan dengan perubahan faktor pengeluaran dan permintaan termasuk faktor spekulasi.

“Pada pendapat saya, untuk jangka panjang, adalah lebih baik jika kita memilih penggunaan mata wang yang ditambat kepada komoditi seperti emas, perak atau mana-mana komoditi yang boleh diguna pakai oleh rakyat,” katanya.

Selain itu, saranan supaya kerajaan segera menyelesaikan skandal 1MDB serta lebih komited perangi rasuah dan penyelewengan dilihat bukanlah langkah yang memberi impak besar kepada prestasi ekonomi negara.

“Skandal isu 1MDB juga masih diuruskan dari segi penyiasatan pelbagai pihak, jadi tidak perlu untuk persoalkan sama ada belum disiasat atau adakah memberi kesan kepada ekonomi negara.

“1MDB ini cuma satu syarikat, satu syarikat tidak mampu mempengaruhi prestasi ekonomi sesebuah negara, jika ada pun dari segi ekonomi amat minimum, dari segi reputasi itu mungkin lainlah.

“Soal banteras rasuah pula, saya kira adalah menjadi keperluan semua pihak untuk memerangi masalah ini, bukan hanya bergantung pada agensi kerajaan, sebaliknya perlu ada kesedaran awam yang menyeluruh.

“Cadangan atau pendapat pelbagai pihak sebenarnya amat dialu-alukan, namun biarlah secara kritikan konstruktif di mana perlu diterangkan secara terperinci agar tidak hanya sekadar retorik sahaja sebaliknya menjadi sebuah pelan yang komprehensif atau sesuai untuk diguna pakai,” katanya.

